

عزة النفس

ينجرح قلب.. لكن ترتفع هامه
والله امي لاموت ولا انحنى راسي
لو رمانى زمانى وسط.. دوامه
العواصف شديده .. والجبل راسي
أنقل الحزن وامشي منتصب قامه
قاسى الوقت .. لكنى بعد قاسي
واسمع الحلم يصرخ لحظه اعدامه
رابط الجاش ... ماهز الخبر باسي
عزتي غاليه .. والناس سوامه
قلت ما بيع حتى تقطع انفاسي

زانت ايام عمري .. شانت ايامه
مارجيت العزى من رحمة الناسي
من عجز لا يدوس الهم باقدامه
لازم انه مع الايام ينداسي
يندمل جرح القلب .. ماتت احلامه
بس ما اظن يبرى جرح الاحساسى
يوم صارت مابين القلب والهامة
وش ابي بالحياة اليا انحنى راسي

مساعدة الرشيدى

كبرياء فرعون

الوفى خصمى وكرهج له باين بالصدور
تعشقين الغدر وقلبى ماوفى بقلب(ن) حزين
لاهيته بالغدر وأيدج بس تطعن بالضهور
ومدري شنهو تستفيده لا بغيتي تطعنين
جايده دورج ولكن ماتصيديني بدور
انا لامنى عشقت غصب انتي تعشقين
والغدر اللي تبينه ما أظن عندي يدور
لنى أملك من وصوف(ن) صعبه انج تملكين
صبر أيوب وخداع إبليس جعله مايثور
وقوة الفارس صلاح الدين اللي له ندين

كبرياء فرعون وحنكة حزموت والغرور
يشبه غرور المدمر هتلى اللي تعرفين
وبالطغاة مثل صدام العراقى ما أشور
أتوكل وأفعل اللي شافته عين(ن) وعين
أفهمي قصدي وعقلج لا يجي عندي يخور
ماهو انتي يافلانه من قدر فيني يهين
حاولو قبلج اوادم دمهم دايم يثور
ومقدر بللى تبينه جان قصدج ماتبين
سعد علوش

